

Ekalesia Faapotopotoga Kerisiano i Amerika Samoa

Lotu Talosaga 2021

Aso Gafua, Ianuari 04 -
Aso Toona'i, Ianuari 09



“Malaga Fa’atasi ma le Atua”
(Journeying Together with God)

Upu Tomua

Tausaga fou manuia, tausaga fou fiafia i le alofa o le Atua! Malo folau EFKAS!

O le aulia mai o le vaiaso o Lotu Talosaga i le amataga o tausaga ta'itasi, e le gata o le avanoa e momoli ai le faafetai i le Atua ona o lana tausiga i le tausaga ua mavae, a o le avanoa foi e tatalo faatasi ai le Ekalesia e faatagisia le Atua ma ana faamanuiaga auā le faigamalaga o le a feagai ai i le tausaga fou ua aulia.

Ua tuana'i atu le 2020 ma ona faigata. O se tausaga ese lea i le faitauina o tausaga i le tala faasolopito o le lalolagi, tagi le faama'i o le Koviti-19. Tele soifua ua maumau, e aofia ai ma nisi o tagata lotu o le EFKAS i atunuu i fafo. Ua oia le olaga sa tatou masani ai. Ua sosolo faaafi lagona o le fefe ma le atuatuvaale. E le gata i lea, ua tapunia faitoto'a o malumalu tapua'i. Ua tapulaa le faapotopoto o tagata i nofoaga faitete. Ua nonofo valavala aiga ona o le tapunia o alavaa ma tua'oi o atunuu. A o le Ekalesia foi, ua aafia le faatinoga o lana galuega tala'i.

O faafatiātama'i ia o le 2020, sa faapea 'ai o le a tafea i le auau ma le toe iloa atu ai. Peita'i, o lea ua tomua ai la tatou faigamalaga i lenei tausaga fou. O fea o taoto ai le finagalo o le Atua mo i tatou ma Lana Ekalesia, a o tatou sauni e malaga i le 2021?

O le sini ua faatulaga mo le Lotu Talosaga a le Ekalesia i lenei tausaga, o loo affi mai ai se feau faalototele mo i tatou ma le Ekalesia, a o tatou sauni e folau i lenei tausaga fou. E ui ina tomua la tatou faigamalaga i fita ma faigata o le soifuaga, ia manatua, tatou te le o malaga na o i tatou, ae tatou te **“Malaga Fa'atasi ma le Atua.”**

O lesu lo tatou ta'ita'i malaga, na te ta'ita'iina la tatou faigamalaga ia taunuu i le manuia. O le Afioga a le Atua o lo tatou tapasā, na te tapena i tatou mo le faigamalaga, ma faatonutonuina i tatou i taimi e sese ese ai ma le ala. O le Agaga Paia o lo tatou malosi, na te faafouina ma faafoisia lo tatou malosi i taimi e vaivai ai ma faatauau gagase ai le faigamalaga. E i ai lo tatou sao e finagalo ai le Atua mo i tatou. A o mea uma mo le faigamalaga, ua mae'a ona saunia e le Atua mo i tatou. O le malaga faatasi foi ma le Atua, e le o se malaga e faia na'o se tagata e to'atasi, a o le malaga a tagata e to'atele – o Lana Ekalesia – e fai faatasi.

A o faamalumu mai pea le Koviti-19 ma isi faigata masani o le olaga i le amataga o lenei tausaga fou, Ekalesia e, tatou te **“Malaga Fa'atasi ma le Atua.”** O a matagi ma peau lagavale o le soifuaga o le a fesou'ina ai la ta faigamalaga i lenei tausaga, o le Atua tatou te malaga faatasi, na te le tuulafoaiina i tatou.

Ia manuia lau tapuaiga EFKAS! Ia manuia foi lau faigamalaga i le 2021!

Aso Gafua – Ianuari 04:

Autū: “O Iesu o lo tatou ta’ita’i malaga” (*Jesus is our Captain*)

Tusi Faitau: Mareko 4:35-41

Matua: f.39 - “Ona tula’i lea o ia, ma na vavao atu i le matagi, ua fetalai atu foi i le vai, ‘Faalologo ia, ina malu ia.’ Ona mate lea o le matagi, i le ua matuā malū.”

O nai mafaufauga fa’atupu manatu:

- E leai se mea e faigata pe a ta’ita’i Iesu i la ta faigamalaga, auā e o’o i le matagi ma peau o le vai, e usita’i ia te ia.
- E ui ina tofa le Alii i le taumuli o le va’a, a o lo tatou faatuatua ia te ia, e malū ai afā tō faafuase’i o le olaga.
- O Iesu o le ta’ita’i malaga sili, o le tautai matapalapala, na te lē ta’ita’iina tatou i ni ōgāsami e le mafai ona tatou asaina.
- O le faatuatua i le Atua o Lē e pule aoao i mea uma, o le oso sili lea ona tāua i soo se faigamalaga, e malaga faatasi ai ma le Atua.

Talosaga:

Tatalo Faafetai: - Faafetai le Atua ua aulia manuia mai lenei tausaga fou. E ui i peau laga vale sa āfātia ai la matou folauga i lena tausaga, a o Iesu sa ta’ita’i malaga; sa lavea’i mai i matou mai matagi ma afā o le 2020, na te toe ta’ita’iina foi i matou i ōgāsami o le 2021 ua matou sauni atu ai. Faafetai mo lau meaalofa o le faatuatua, aemaise o avanoa e ala i fita ma faigata o le soifuaga, ua faaaoga e faamallosia ma faatuputeleina ai lo matou faatuatua i lau Afio, e ala i lou faatasi mai. Faafetai le Atua.

Tatalo Faatoesega: - Faamagalalo i matou ona o lo matou faatuatua itiiti i lena tausaga ua mavae. Ua solomuli lo matou ola auauna i lau Afio ina ua matagitaumuaina la matou faigamalaga i fita ma faigata o le soifuaga. Ua popole vale o matou loto, ae galō ai lau Afio o loo tatou malaga faatasi. Ua matou faalagolagō i se poto ma se malosi faatauvaa ua matou maua, a ua faatuatuana’i ai lau Afio o le ta’ita’i malaga sili, e saofia ma taunuu manuia ai soo se malaga matou te feagai ai. Faamagalalo i matou.

Tatalo Mana’oga: - Le Atua e, ia faamalumu mai ou ‘aao alofa i la matou faigamalaga i lenei tausaga. Ia faaaupagaina i matou i le faatuatua, e mafai ai ona matou faamoemoe ma faalagolago i lau Afio e te lavea’iina matou mai peau laga vale o le soifuaga. Foaia mai le lototele e mafai ai ona matou tetee atu i faaososoga. Aumaia le malosi faafouina matou te fulitua ai i le musuā ma le fiugofie. Tautai oe Iesu le ta’ita’i malaga sili, e taunuu manuia ai la matou faigamalaga i lenei tausaga fou, Amene.

Aso Lua - Ianuari 05:

Autū: “O le Afioga a le Atua o lo tatou tapasā” (*God’s Word is our Compass*)

Tusi Faitau: Salamo 119:105-112

Matua: f.105 - “O lau afioga o le sulu lea i o’u vae, ma le malamalama i lo’u ala.”

O nai mafaufauga fa’atupu manatu:

- O le tapasā o le mea faigaluega e faatonu ala i le ala e malaga ai le tagata folau. E faapena le Afioga a le Atua, o le tapasā e faatonu ala i le ola e soifua ai le tagata faatuatua.
- O le Afioga a le Atua o lo tatou tapasā, na te a’oa’o ma faatonuina le ala e tatau ona tatou ola ai, a o tatou malaga ai faatasi ma le Atua.
- E i ai taimi e pogisa ai lo tatou vaai i le ala ona o le agasala ma puapuaga o le olaga. A o le Afioga a le Atua, e susulu i o tatou vae ina ia manino ma malamalama ai la ta vaai i le ala.
- E i ai foi taimi tatou te leiloloa ai i luga o le ala ona o faaososoga ma filifiliga sese tatou te faia. A o le Afioga a le Atua e faatonuina tatou i le ala sa’o e ui ai, e toe faauuau ai le faigamalaga.

Talosaga:

Tatalo Faafetai: - Faafetai le Atua i lau Afioga Paia sa fai ma tapasā i la matou folauga i lena tausaga; e maua ai Upu o le ola e tapena ai le soifua malaga o lau fanau faatuatua, pe a moni ona matou faalogo ma usita’i i ai. Faafetai i lau Afioga i le fa’asusulu mai pea i o matou vae e faamalalama mai i lo matou ala, ua matou maua ai le lototele ma le mafanafana e malaga faatasi ai ma lau Afio i lena tausaga fou. Faafetai le Atua.

Tatalo Faatoesega: - Faamagalo lo matou ola faatuatua’i i lau Afio ma lau Afioga, ina ua atuatuvaale o matou loto i fita ma faigata o le soifuaga. Ua matou saili i le potu o le lalolagi e faatonutonu ai lo matou ola, ae galo ai lau Afioga o le tapasa moni mo le tagata faatuatua. Ua matou fiafia ai e savavali i ala o le pogisa. Ua matou ‘alo ai ma lou malamalama e faasusulu mai e lau Afioga i o matou ala, ina ua pupū pea o matou loto i tu’inanauga o le lalolagi. Faamagalo i matou.

Tatalo Mana’oga: - Le Atua e, ia faasusulu mai pea lau Afioga i o matou vae, ina ia malamalama ai le ala matou te folau ai i lena tausaga fou. Ia faatupu le fiafia i o matou loto e faalogologo ma su’usu’e i lau Afioga, e avea ai ma tapasā i taimi matou te leiloloa ai i le ala. Ia faatonu mai le amio e tatau ona matou ola ai. Ia faasino mai le ala e tatau ona matou uia. Ia tapena ma faasaunia matou mo le faigamalaga, i la le tino, mafaufau, ma le agaga, e ala i le Upu o le Ola e laulau mai pea e lau Afioga, Amene.

Aso Lulu – Ianuari 06:

Autū: “O le Agaga Paia o lo tatou malosi” (*The Holy Spirit is our strength*)

Tusi Faitau: Efeso 3:14-21

Matua: f.16 - “*Ina ia foa’iina ia te outou e tusa ma le faula’i o lona viiga, ia faamalosia outou i le mana e lona lava Agaga, i le tagata i totonu...*”

O nai mafaufauga fa’atupu manatu:

- E le gata o lo tatou Fesoasoani Sili, a o le Agaga Paia foi na te aumaia le malosi i taimi tatou te vaivai ai, e faaauau ai le malaga seia oo ina taunuu.
- E le o le malosi faaletino, a o le malosi ‘i le tagata i totonu,’ o le faaleagaga lea, tatou te lavātia ai fita ma faigata o le malaga.
- O le malosi lea e mafai ai e le tagata ona tetee i faaososoga; o le malosi e fai ai le mea sa’o i taimi le talafeagai; o le malosi e maua ai le lototele e tautala ai i le mea moni e ui ina inosia ai e isi; o le malosi foi e faatino ai le finagalo alofa o le Atua mo isi, e tusa lava pe tetee mai ai le to’atele.

Talosaga:

Tatalo Faafetai: - Faafetai Agaga Paia i le malosi sa faasoa mai i lona tausaga ua mavae. Tele taimi sa matou lagona ai le vaivai. Tele fita ma faigata sa lutia ai matou i le ala. Sa lagona le musuā ma le fia solomuli. Peitai, o le Agaga o lau Afio ma lona mana, na faamalosia ai lo matou vaivai ma fa’aatoatoaina ai lo matou le atoatoa. O galuega ia o le Agaga ua matou maua ai le faamoemoe ola, e te le tuulafoaiina le soifua malaga o lau fanau faatuatua i lenei tausaga fou. Faafetai le Atua.

Tatalo Faatoesega: - Faamagalalo lo matou tetee pea i le musumusuga o le Agaga, ua matou le maua ai le malosi faafouina e pei ona e finagalo ai. Ua matou faamoemoe i le malosi faaletino ma le tamaoaiiga ua matou maua, a o malosi ia faale-lalolagi e le tumau, e gata mai. Ua osofa’ia ai i matou i faaososoga. Ua matou mumusu ai e molimau ma tautatala i le mea sa’o. Ua matou fefefe e faatino lou finagalo alofa i taimi e tatau ai, ina ua matou fulitua i le Agaga Paia. Faamagalalo i matou.

Tatalo Manaoga: - Mafuta mai Agaga Paia e uli ma sao ai la matou folauga i lenei tausaga fou. E ui ina tomua i fita ma faigata o le soifuaga, ae matou te tatalo Agaga Paia, aumaia le malosi faaleagaga e mafai ai ona matou lavātia ma manumalo i faigata uma o le a matou feagai ai i le ala. Foa’i mai le lototele, faapupula o matou mata faaleagaga, ma ia faamalosia lo matou ola faatuatua i lau Afio e ala i lou faatasi mai, e mafai ai ona taunuu manuia la matou faigamalaga i lenei tausaga fou, Amene.

Aso Tofi - Ianuari 07:

Autū: “E saunia e le Atua mea uma” (*God provides everything*)

Tusi Faitau: 1 Tupu 17:1-7

Matua: ff.5-6 - “*Ona alu ai lea o ia ma na ia faia e tusa ma le afioga a le ALII; ua alu o ia ma nofo i le alia o Kirita, e feagai ma Ioritana. Na aumai foi e oreva ia te ia o areto ma aano o manu i le taeao; o areto foi ma aano o manu i le afiafi, ua ia inu foi i le alia.*”

O nai mafaufauga fa’atupu manatu:

- O le malaga faatasi ma le Atua, o lona uiga, e saunia e le Atua mea uma mo le faigamalaga, auā e lava ma totoe lana faasoa.
- E saunia e le Atua mea uma pe a tatou faalogo ma usita’i i lona fetalai mai. E pei o Elia, na faalogo ma usitai i le afioga a le Atua na oo mai ia te ia, ma, na saunia ai e le Atua mea uma mo ia.
- E saunia e le Atua mea uma tatou te manaomia, ae le o mea tatou te mananao ai. O le vai ma mea ‘ai, o mea ia na silafia e le Atua e manaomia e Elia e maua ai le malosi e faaaauai ai le malaga.
- E saunia e le Atua mea uma i ona lava taimi e tatau ai, ae le o taimi tatou te fuafuaina. O le taeao ma le afiafi, o taimi ia na silafia e le Atua e manaomia ai e Elia le faamalosi tino.
- E saunia e le Atua mea uma i ona lava ala e tatau ai, ae le o ala tatou te faamoemoeina. O le oreva o le manu lele e sili ona lima mau ma matapeapea i ana mea ‘ai e maua, a ua faaaoga e le Atua e fafaga ai Elia. O ala e lei mafaufauina e le tagata, ae faaaoga e le Atua e auala atu ai lana faasoa mo lana fanau.

Talosaga:

Tatalo Faafetai: - Faafetai le Atua mo lau faasoa mo i matou i lena tausaga ua mavae. Tele taimi sa matou matitiva ma le tagolima ai, a o lau Afio na e faasoa mai mo i matou i ou lava taimi ma ala e tatau ai. O taimi ma ala matou te lei faamoemoeina, a o lea ua ta’utino mai ai lou alofa ma lau tausiga mo i matou. Faafetai le Atua.

Tatalo Faatoesega: - Matou te faatoesese ona ua matou vavevave i faiga ua masani ai le lalolagi mo le tausiga o lo matou ola, ae galo ai lau Afio ma lau faasoa, e te saunia mea uma mo i matou. Ua matou faatuatuanai i lau Afio o le puna o mea lelei ma faamanuiaga uma. Faamagalalo i matou.

Tatalo Manaoga: - A’oa’o mai ina ia matou iloa ona ola faalagolago i lau Afio ma lau faasoa e le uma. E pei ona e faasoa mai mo i matou ma la matou faigamalaga, ia faapena ona matou fiafia e faasoa atu i isi ua lima vaivai ma manaomia le fesoasoani i lenei tausaga fou, Amene.

Aso Faraile – Ianuari 08:

Autū: “O lou sao i le faigamalaga” (*Your part in the journey*)

Tusi Faitau: Mika 6:1-8

Matua: f.8 - “*Sole, ua faaali atu e ia ia te oe le mea lelei; se a foi se mea e finagalo i ai le ALII ia te oe pe a le o ia mea: ia fai le amiotonu, ia naunau i le alofa, ma ia feoa’i ma lou Atua ma le loto faamaulalo?*”

O nai mafaufauga fa’atupu manatu:

- O le malaga fa’atasi ma le Atua, e le o se malaga tatou te nofonofono ai e pei o ni turisi, e leai. E i ai lo tatou sao i le faigamalaga.
- Faaleo e le perofeta o Mika le sao e finagalo ai le Atua mo i tatou, ‘...*ia fai le amiotonu, naunau i le alofa, ma feoa’i ma lou Atua ma le loto faamaulalo.*”
- ‘*Ia fai le amiotonu,*’ o le faia lea o le amio e tonu i lou va ma isi tagata. E le o se mau e na’o na talitonu i ai, a o le gaoiga e tatau ona ola ai ma faatino i aso uma.
- ‘*Ia naunau i le alofa,*’ e faatatau i le alofa osi feagaiga a le Atua. O le alofa lea e le o se lagona e pei ona tatou masani ai, a o le faatinoga, e faia lea mo soo se tasi o loo manaomia le fesoasoani.
- ‘*Feoa’i ma lou Atua ma le loto faamaulalo,*’ e faatatau lea i lou mafutaga ma le Atua. E le gata ia lagona le loto maulalo i lou va feagai ai ma le Atua, a o au galuega faatino ma lau auaunaga i le Atua, ia faia ma le loto maulalo i lou va ma isi.

Talosaga:

Tatalo Faafetai: - Faafetai le Atua i le faaali manino mai o lou finagalo, e tatau ona matou ola ma savavali ai - ia fai le amiotonu, ia naunau i le alofa, ma ia mafuta ma lau Afio ma le loto faamaulalo. E ui o le faigamalaga e saunia ai e lau Afio mea uma, ae faafetai i lou finagalo manino ua matou mautinoa ai i la matou pito laau tauave, o le tausia lea o le amiotonu, o le alofa, ma le loto maulalo, i le va ma isi o matou uso. Faafetai le Atua.

Tatalo Faatoesega: - Faamagalaga i matou ona ua le tonu a matou amio e fai. Ua leai se naunau e faatino le alofa, e pei ona faata’ita’i mai e Iesu. Ua le maua le loto maulalo i le faatinoga o la matou auaunaga i lau Afio, ona o le fiasili ma le fia matamuamua i luma o isi tagata. Faamagalaga i matou.

Tatalo Manaoga: - Aumaia le lototele matou te faia ai le amiotonu i soo se mea matou te i ai, aemaise i nofoaga o loo saisaitia ma taotaomia ai lau fanau. Faatuputele lo matou naunau e faatino le alofa e pei o Iesu, ma ola i le loto maulalo i mea uma matou te faia mo lau Afio; e avea ai i matou ma faata’ita’iga lelei i isi o matou uso Kerisiano, Amene.

Aso Toona'i - Ianuari 09:

Autū: “Malaga fa’atasi ma le Atua o se Ekalesia ua tasi”

(Journeying together with God as a Church in Unity)

Tusi Faitau: 1 Korinito 12:14-26

Matua: f.26 - *“Pe afai e tiga le tasi itutino, ia tiga faatasi ai itu tino uma lava; pe viia le tasi itu tino, ia olioli faatasi ai itu tino uma lava.”*

O nai mafaufauga fa’atupu manatu:

- O le malaga faatasi ma le Atua, e le o se malaga e faia na’o se tagata e to’atasi, a o le malaga a tagata e to’atele e fai fa’atasi. O le ata lea o le Ekalesia e malaga faatasi ma le Atua.
- O le Ekalesia o le tino o Keriso i le lalolagi; e tasi le tino, ae tele itutino. E tofu le itutino ma lona sao i le tino atoa. A aafia se itutino e tasi, e faapena ona aafia le tino atoa.
- O ‘aufaipese, Mafutaga a Tina, Tupulaga talavou, Aoga Aso Sa, o le ‘aufaigaluega, o Tiakono, ‘Au Taumafai, ‘Au Leoleo, ma isi; o itutino masani ia o le Ekalesia. O le Ekalesia e malaga faatasi ma le Atua, e le malaga na’o se itutino e tasi, a o itutino uma e malaga faatasi, auā e tofu le itutino ma lona sao i le Ekalesia.
- E manaomia e le Ekalesia ma ona itutino ona nonofo fealofani, galulue faatasi, fealolofaa’i, fefaamagaloo’i, ma loto gatasitasi; o ala ia e manuia ma taunuu faatasi ai le faigamalaga i lenei tausaga.

Talosaga:

Tatalo Faafetai: - Faafetai le Atua i lou puipei malu i lau Ekalesia i lenei tausaga ua mavae, aemaise ona o le Koviti-19. Ua tapunia ai faitotoa o malumalu tapua’i. Ua le maua ai se mafutaga ma isi o matou uso, aemaise o tamā ma tinā matutua. Ua oia ai foi le faatinoga o le soifua auauna i lau Afio e pei ona matou masani ai. Ae faafetai mo lau tausiga, lea ua matou aulia ai ma matou sauni ai e folau i lenei tausaga fou. Faafetai le Atua.

Tatalo Faatoesega: - E anoanoa’i faaletonu a lau Ekalesia i lenei tausaga ua mavae. Ua toilalo i matou i le fefe ona o le Koviti-19, ua le faatino ai la matou auaunaga i lau Afio. Ua matou lafoai i lau galuega, a ua le saili nisi auala talafeagai e tala’i atu ai lou fingingalo i tagata. Faamagaloo i matou.

Tatalo Manaoga: - Ia matou folau i lenei tausaga o le aiga e tasi ma le Ekalesia ua tasi. Galue lou Agaga i itutino uma o le Ekalesia ina ia nonofo faatasi ma galulue faatasi, a o matou folau ai i lenei tausaga. Faamanuia i le Ekalesia Aoa ma Ekalesia ta’itasi o le EFKAS – i Amerika Samoa, Amerika, Niu Sila ma Ausetalia. Tatou ma lau Afio i lenei tausaga fou 2021, e folau ai i manū lau Ekalesia i lou alofa ma lou agalelei, Amene.